



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

3. Cyclopis donum, quale.

[urn:nbn:de:hbz:466:1-68709](https://nbn-resolving.org/urn:nbn:de:hbz:466:1-68709)

Id quod statura pusillus, falsò diciturò notavit, dicens: *Superiora magnarum adium non habitari*. Eleganter Phauorinus philosophus: nihil in terris magnum præter hominem: nihil in homine magnum, præter mentem. Sic sternit parva spatiosum vipera taurum. Sic David fundâ dejecit formidabilem Goliathum; ibique mortem intulit, ubi nullum munimentum invenit, scilicet in cerebro, quod ictui patuit, quia sine mente fuit. In eo quoque sagax Vlyssis ingenium apparuit, quòd lanigero sub grege latens, cum sociis evaserit. Rides fabulosum strategema? historicum audi. Circa annum 1311. Rhodus insula simili astu ab Equitibus S. Joannis capta est. Adverterat Equitum Præfectus pastores quot-diebus ovium greges manè educere, & sub obscuro vespere reducere. Immixti his plures milites pelle ovina tecti, manibus & pedibus reptantes; ipse verò Dux habitum pastoritium indutus subsequatur: primò portis, deinde urbe & insula potiti sunt. Henric. Engelyran. in Pantheo, festo Nativit. Domini. §. 2. ubi vitiosè annotatus annus.

II. (b) Polyphemo exitium vinum quoque attulit, nam maximos quoque in ruinam impellit temulentia. Et tamen pastor erat, quem vigilantia decebat, & cura pecoris. Væ ovibus, quarum custodes uno tantùm præditi sunt oculo, hoc est, modico prudentiæ lumine, & hoc ipsum perpotandi libidine obnubilant, obscurant, obtenebrant, extinguunt! Cæco ductore, quæ spes est gregi? Vlysses etiam voluptatis typum exhibet: dulce propinat poculum, in suavem declinat lumina somnum; dum dormitur, interitur.

III. (c) In adagiis fertur: *Cyclopi donum*, nam Polyphemus delectatus dulci vino, quod illi donârat Vlysses, munus ei promissit; quò acceptò magnopere sit gavisurus, si denuo sibi ministret de sua lagena. Dedit Vlysses iterum atque iterum. Porro cùm jam vîno delinitum, crederet mitiùs responsurum; reposcit Vlysses munus promissum. Cui cyclops hunc in modum respondit.

Ὅστιν ἐγὼ πύματον ἔδομαι μετὰ οἷς ἐτάροισι,
Τὲς δ' αἶψας πρόσθεν τοῖδε τοῖ ζηνήϊον ἔσαι.

Homer. Odyss. lib. 9.

Post socios mihi, postremusque vorabitur Vtis,
At reliqui prius: hoc ex me tibi munus habebis.

Sic Micyllus cerdo apud Lucianum, cùm quereretur, quod non statim cum aliis in cymbam Charontis reciperetur, hanc ipsam ei Clotho

(b) Somnolentia & Negligentia pastorum. (c) Cyclopi donum quale.

tho *Parca* beneficii loco imputavit morulam, quã paulò tardiùs ad inferos descenderet. Hujusmodi sunt ferè tyrannorum & latronum beneficia, qui solent hoc ipsum magni beneficii loco imputare, quòd aut minus aut seriùs noceant. In hanc sententiam Cicero Philipp. 2. Quod est aliud beneficium latronum, nisi ut commemorare possint, iis se vitam dedisse, quibus non ademerint.

IV. (d) In eo quoque Polyphemus Tyrannos refert, qui epulas suas humano sanguine instruunt. Hinc *Cyclopica vita*, id est, effera, batbara, crudelis, immanis, Divùm hominùmque contemprix. Quàm arroganter Cyclops apud Homerum compellat Vlysssem, vitæ suæ, sociorùmque gratiam per superos rogantem!

Desipis, aut certè longinquis hospes ab oris
Hic ades, ut qui me jubeas, curave moveri,
Sive timore Deùm: neque enim Cyclopica turba
Curamus summùmve Jovem, Divòsve beatos.

Ejusmodi Polyphemi fuerunt Bajazetes, de quo SURIUS anno Chr. 1511. Expugnata Metone Peloponensi urbe, promiscuèque in omnem sexum, ætatem, conditionem strage edita, mille erant capita vel servituti vel libidini servata. Captivi longis adstricti funibus ad Bajazetis prætorium perducti, sævissimi Tyranni jussu sub ejus oculis immanè trucidati sunt. Talis Polyphemus fuit Lucius Cornelius Sylla Dictator Roman. qui in bello Mariano septem millia militum contra se arma ferentium in *Circum* maximum conclusos jugulari imperavit. Sub ipsum orationis suæ principium, quam in æde Bellonæ ad senatum habuit, coorto ad tot occisorum miserandos ejulatus in omnium Senatorum animis horrore, concussioneque mentium; ipse sedens vultu immoto jussit eos auribus & animis sibi dicenti adesse; in pauculas enim mastigias suo imperio animadverti. Non secùs ac si tot millium laniena, non nisi canis unius, aut anseris esset decollatio. *Volesus* sub Augusto, Asiæ Proconsul, qui ducentos quinquaginta uno die securi percussit, ut Seneca scribit de ira c. 5. Incedens inter cadavera superbo vultu, quasi magnificentum quiddam, conspiciendumque fuisset. Græcè proclamavit, ὡς πρᾶγμα βασιλικόν. Ó regiam rem! Talis *Hannibal*, quem dixisse ferunt, cum fossam plenam humano sanguine vidisset: Ó formosum spectaculum! Talis *Aulus Vitellius*, qui cum adisset campos, in quibus à suis legatis erat pugnatum contra Othonem, cadaverum tabe horrentes, detestabili voce dixit: *optimè olere occisum hostem, & magis civem.* Sueton.

(d) *Cendelitas tyranni.*